

Siunnersuummut nassuiaatit

Nassuiaatit nalinginnaasut

1. Aallaqqaasiut

Uuliamik mingutsitsinermit upalungaarsimaneq, uuliamik mingutsitsinermit akiuiniarneq, uuliamik mingutsitsinerup kingorna avatangiisini saliineq aammalu Kalaallit Nunaanni aatsitassanut suliaasaqarfiup iluani tamatumunnga assingusumik suliaqarneq pillugit niuernermit tunngavilimmik suliffeqarfimmik ingerlatsinissaq Greenland Oil Spill Response A/S-imut siunertaavoq. Ingerlatseqatigiiffik aamma tamanna ingerlatseqatigiiffiup malittarisassaanni allassimappat, Kalaallit Nunaanni suliaasaqarfiit allat iluanni taamatut suliaqarnermit ingerlatsinissaavoq. Ingerlatseqatigiiffiup siunertaa aamma tassaavoq Kalaallit Nunaanni aatsitassanut suliaasaqarfiup iluani uuliamik mingutsitsinermit upalungaarsimanermik pilersitsinermit, ingerlatsinermit piorsaanermullu peqataasinnaaneq, ilanngullugit sungiusarnerni iliuuseqarluni peqataasarnertit, takukkit Greenland Oil Spill Response A/S pillugu Inatsisartut inatsisaanni § 1, imm. 4 aamma 5.

Taamaalilluni Greenland Oil Spill Response A/S-ip atuuffissaa pingaarneq tassaavoq uuliaarluermit atatillugu mingutsitsinermit akiuiniarnissaq, aammalu ikummatissiassanut akuersissut malillugu pisinnaatitsissummik pigisaqartut ingerlatseqatigiiffimmut aningaasaqarnikkut tapersiinnissamut pisussaaffeqarput.

Annertunerusumik uuliaarluermissap aarlerinaateqarnera sinerissap avataani uuliasiorluni misissugassanik qillerinernut qalluinernullu attuumassuteqarpoq. Sinerissap avataani misissuinissamut qalluinissamullu ikummatissiassanut akuersissutinik ingerlatsivigineqartunik soqanngilaq, aammalu Grønlandshavet-imi ikummatissiassanut akuersissutinik tunniussinissaq pillugu tamanut ammasumik qinnuteqaqqusinissaq (neqeroortitsineq) maannamuugallartoq kinguartinniarlugu Naalakkersuisut ulloq 24. juni 2021-mi aalajangerput.

Taamaalilluni sinerissap avataani ikummatissiassanik misissuinissamut qalluinissamullu akuersissutinik atuuttoqanngimmat, aammalu akuersissutinik nutaanik tunniussisoqartussaannngimmat, ingerlatseqatigiiffiup uuliamik mingutsitsinermit akiuiniarnissamik siunertaqartup atuutsiinnarnissaa tunngavissaqarsorineqarunnaarpoq.

Taamaattorli ikummatissiassanit misissuillunilu qalluinermit naleqqiullugu najoqqutaasunut allanut tunngatillugu uuliamik mingutsitsinermit akiuinissamut upalungaarsimaffiup attatiinnarnissaa suli kissaatigineqarpoq, taamaattumillu ingerlassami allami ingerlatseqatigiiffiup pigisai nalillit ingerlataalu ingerlateqqinneqassapput.

Greenland Oil Spill Response A/S pillugu Inatsisartut inatsisaata atorunnaarsinneqarnerata kingunerisaanik ingerlatseqatigiiffiup atuutsiinnarnissaanut Naalakkersuisut pisussaaffeqarunnaassapput, aammalu ingerlatseqatigiiffiup atorunnaarsinnissaanik naggateqartitsisumik ingerlatassamik aallartisaasoqarsinnaalissaaq. Piviusuni ingerlatseqatigiiffiup pigisai nalillit ingerlataalu Namminersorlutik Oqartussat pigisaattut ingerlatseqatigiiffimmut allamut nuunniarneqassapput (siunnersuutip saqqummiunnera sioqqullugu SIKUKI-lu isumaqatiginninniartoqarsimavoq), tamatuma kingornatigut

ingerlatseqatigiiffinnut inatsisilerinikkut malittarisassiat tamakku najoqqutaralugit ingerlatseqatigiiffik atorunnaarsinneqarsinnaalluni.

2. Siunnersuummi immikkoortut pingaarnerit

Greenland Oil Spill Response A/S pillugu Inatsisartut inatsisaat nr. 4, 4. juni 2012-imeersoq atorunnaarsinneqassasoq, aammalu atorunnaarsitsineq Inatsisartut inatsisaata atuutilernerata nalunaarutigineqarnerata aqaguani atuutilissasoq siunnersuutigineqarpoq.

3. Pisortanut aningaasaqarnikkut allaffissornikkullu sunniutaasussat

Ingerlatseqatigiiffiup atorunnaarsinnera Naalakkersuisunut allaffissornikkut sipaaruteqarnermik kinguneqassaaq.

4. Inuussutissarsiortunut aningaasaqarnikkut allaffissornikkullu sunniutaasussat

Siunnersuut inuussutissarsiortunut aningaasaqarnikkut allaffissornikkullu sunniuteqassangatinneqanngilaq.

5. Avatangiisinut, pinngortitamut inuillu peqqissusaannut sunniutaasussat

Siunnersuut avatangiisinut, pinngortitamut imaluunniit inuit peqqissusaannut sunniuteqassangatinneqanngilaq.

6. Innuttaasunut sunniutaasussat

Siunnersuut innuttaasunut aningaasaqarnikkut sunniuteqassangatinneqanngilaq.

7. Sunniutaasussat annertuut allat

Siunnersuut allanik annertuunik sunniuteqassangatinneqanngilaq.

8. Oqartussanut kattuffinnut ilaalu ilanngullugit tusarniaaneq

Siunnersuut piffissami 5. juuli 2022-mit 26. juuli 2022-mut Naalakkersuisut tusarniaassutitut nittartagaanni, www.naalakkersuisut.gl-imi tamanut saqqummiunneqarsimavoq.

Aatsitassanut Naalakkersuisoqarfiup pisortanit, kattuffinnit suliffinnillu tusarniaanermut akissutit makku pissarsiarisimavai:

Sulisitsisut, aamma Aatsitassanut Tunngasuni Avatangiisinik Aqutsisoqarfik.

Oqaasertalersukkatut tusarniaanermut ataatsimut takussutissiaq, ilanngussatut kakkiiunneqartoq innersuutigineqarpoq.

Siunnersuummi aalajangersakkanut ataasiakkaanut nassuiaatit

§ 1-imut

Greenland Oil Spill Response A/S pillugu Inatsisartut inatsisaat nr. 4, 4. juni 2012-meersoq, Inatsisartut inatsisaanni nr. 22, 3. december 2012-imeersumi allanngortinneqartoq, atorunnaarsinneqassasoq siunnersuutigineqarpoq.

§ 2-mut

Imm. 1-imut

Inatsisartut inatsisaat inatsisip atuutilernerata nalunaarutigineqarnerata aqaguani atuutilissasoq siunnersuutigineqarpoq.

Imm. 2-mut

Ingerlatseqatigiiffiup atorunnaarsinnissaa pillugu immikkut inatsisaasup kingunerisaatut Greenland Oil Spill Response A/S taamaallaat akitianik piginneqatigiiffiit pillugit nalinginnaasumik inatsisini ilaalersussaassasoq aalajangersakkami aalajangiunneqarpoq. Tamatuma kingornatigut Greenland Oil Spill Response A/S-ip pigisai nalillit ingerlataalu ingerlatseqatigiiffimmut allamut nuunnissaanut ingerlatsinermik aallartitsisoqarsinnaalissaaq, Greenland Oil Spill Response A/S-ip atuukkunnaarsinnissaa tassani siunertarineqarluni.

Tusarniaanermut allakkiaq

Tamanut ammasumik tusarniaaneq

Inatsisissatut siunnersuummut allaqqaagaq piffissami 5. juuli 2022-mit 26. juuli 2022-mut tamanut ammasumik tusarniaassutaasimavoq.

Aatsitassanut Naalackersuisoqarfiup pisortanit, kattuffinnit suliffinnillu tusarniaanermut akissutit makku pissarsiarisimavai:

Sulisitsisut, aamma Aatsitassanut Tunngasuni Avatangiisinik Aqutsisoqarfik.

Tusarniaanermut akissutini tiguneqartuni pingaarnertut pineqartut ataani uteqqinneqarput. Tusarniaanermut akissutinit Aatsitsaanut Naalackersuisoqarfiup oqaaseqaatai orlingasunik naqinnilikkanik nalunaarsugaapput.

Ingerlatseqatigiiffiup pigisai nalillit ingerlataalu qanoq Naalackersuisut ingerlateqqinnissaannik isumaliuteqarsimanerisa nassuiarneqartariaqarneri Sulisitsisut eqqaavaat.

Ingerlatseqatigiiffiup pigisaasa nalillit ingerlataasalu ingerlateqqinnissaannut pilersaarutaasut siunnersuummi ilanngussorneqarsimapput.

Aatsitassanut Tunngasuni Avatangiisinik Aqutsisoqarfiup tusarniaanermut akissut paatsuinernik kukkusunillu naatsorsuutigisanik tunngaveqartoq nassiussimavaa.

Aatsitassanut Tunngasuni Avatangiisinik Aqutsisoqarfiup oqaaseqaatai allannguuteqarnissamut tunngavissiisimangillat.